


प्रसार भारती
प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन

18.10 भानिवार

दिनांक 30.05.2026



प्रमुख समाचार –

- 1– नगरीय निकाय अउ पंचायत चुनाव बर आज रतिहा थम जही प्रचार–परनदिन एक जून के होही मतदान ।
- 2– छत्तीसगढ़ म चलत जनगणना के पहिली चरण के आज आखिरी दिन हरय ।

अउ

- 3– हिंदी पत्रकारिता के दू सौ बछर पूरा होय के उपलक्ष्य म रायपुर प्रेस क्लब डहार ले आज राजधानी रायपुर म पत्रकारिता गौरव मार्तण्ड उत्सव के आयोजन करे गीस ।

.....

त्रिस्तरीय पंचायत उपचुनाव

प्रदेस म नगरीय निकाय अउ त्रिस्तरीय पंचायत के आम अउ उपचुनाव के तहत एक जून के मतदान होही । ए चुनाव मन बर प्रचार के आज आखिरी दिन हरय । आज रतिहा बारह बजे ले प्रचार थम जही । एखर बाद प्रत्यासी मन घर–घर जाके संपर्क करही ।

छत्तीसगढ़ राज्य निर्वाचन आयोग डहार ले देगे जानकारी के अनुसार नगरीय निकाय मन म कुल दू सौ चालीस अउ त्रिस्तरीय पंचायत मन म कुल तीन सौ बयानवे अभ्यर्थी चुनाव मैदान म हे । त्रिस्तरीय पंचायत चुनाव के अंतर्गत नाम वापसी के प्रक्रिया पूरा होय के बाद पंच के छै सौ चालीस पद बर निर्विरोध निर्वाचन होगे रिहीस । उन्हें, सरपंच के पंद्रह पद बर निर्विरोध निर्वाचन संपन्न होय हे । शेष चौतीस पद बर मतदान होही । अइसने,

जनपद सदस्य के दस पद बर एक जून के मतदान होही। नगरीय निकाय चुनाव के तहत पार्षद के कुल इकहत्तर अउ अध्यक्ष पद के पांच स्थान बर मतदान होही।

नगरीय निकाय चुनाव बर इलेक्ट्रानिक वोटिंग मसीन-ईवीएम के माध्यम ले अउ पंचायत चुनाव बर मत पेटी के माध्यम ले मत डाले जाही। राज्य निर्वाचन आयोग ह मतदान बर सबो तैयारी पूरा कर ले हे।

जनगणना-अंतिम दिन

छत्तीसगढ़ म चलत जनगणना के पहिली चरण के आज आखिरी दिन हरय। एक मई ले सुरु होय जनगणना के पहलइया चरण के बयानवे प्रतिशत ले जादा काम पूरा हो गेहे। प्रदेश म जनगणना बर अड़तालीस हजार सात सौ बयालीस ब्लॉक बनायगे रिहीस। हर ब्लॉक म औसतन एक सौ पैसठ मकान सामिल हे। इही आधार म प्रदेश म अस्सी लाख ले जादा मकान मनके आंकड़ा आगू आय हे। ए मकान मनके पूरा विवरण पहिली बार डिजीटल रूप म सरकारी रिकार्ड के हिस्सा बनत हे। आज आखिरी दिन, शेष बांचे घर मन तक जाके प्रगणक मन ह आंकड़ा अपडेट करीन।

जनगणना के दूसरइया चरण अवइया बछर एक फरवरी ले सुरु होही।

हिंदी पत्रकारिता दिवस

आज हिंदी पत्रकारिता दिवस हरय। बछर अट्टारा सौ छब्बीस म आज के दिन हिंदी भाषा के पहलइया समाचार पत्र उदन्त मार्तण्ड प्रकासित होय रिहीस।

हिंदी पत्रकारिता के दू सौ बछर पूरा होय के उपलक्ष्य म रायपुर प्रेस क्लब डहार ले आज राजधानी रायपुर म पत्रकारिता गौरव मार्तण्ड उत्सव के आयोजन करे गीस। ए कारीकरम के सुभारंभ मुख्यमंत्री विष्णुदेव साय ह करीन। समारोह ल संबोधित करत हुए मुख्यमंत्री ह किहीन कि मीडिया के सकारात्मक आलोचना केवल व्यक्ति ल ही नही, बल्कि प्रशासन अउ सरकार ल घलो आत्म मंथन अउ बेहतर कार्य के दिसा प्रदान करथे। ओमन किहीन कि पत्रकारिता ह राष्ट्रनिर्माण अउ सामाजिक परिवर्तन म ऐतिहासिक भूमिका निभाय हे।

कार्यक्रम ल वित्त मंत्री ओपी चौधरी अउ वरिष्ठ पत्रकार के.जी. सुरेश ह घलो संबोधित करीन। अतिथि मनके सुवागत रायपुर प्रेस क्लब के अध्यक्ष मोहन तिवारी ह करीन। ए मउका म मुख्यमंत्री ह पत्रकारिता के क्षेत्र म उल्लेखनीय योगदान देवइया वरिष्ठ पत्रकार मन ल लाइफ टाइम अचीवमेंट अवार्ड ले सम्मानित करीन।

सीबीएसई-पोर्टल

केंद्रीय माध्यमिक शिक्षा बोर्ड-सीबीएसई ह किहीन हे कि उंखर पोस्ट रिजल्ट एक्टिविटी पोर्टल सोमवार एक जून ल सक्रिय हो जही। आवेदन करे के इच्छुक विद्यार्थी मनके उत्तर पुस्तिका मन के सत्यापन अउ पुनर्मूल्यांकन के पारदर्शी प्रक्रिया सुनिश्चित करे बर ए पोर्टल ल सुरू करे जात हे। एखर ले मूल्यांकन के सर्वोच्च मानदंड स्थापित होही।

विद्यार्थी उत्कृष्ट योजना-परीक्षा स्थगित

मुख्यमंत्री अनुसूचित जाति अउ अनुसूचित जनजाति विद्यार्थी उत्कृष्ट योजना के तहत चालू शैक्षणिक सत्र म कक्षा छठवीं म प्रवेश बर छब्बीस जुलाई के आयोजित होवइया लिखित परीक्षा ल स्थगित कर देहे।

गुरु अर्जुन देव-शहीदी दिवस

सिक्ख धर्म के पांचवा श्री गुरु अर्जुन देव जी के शहीदी दिवस के मउका म गुरुद्वारा म शबद कीर्तन के आयोजन करे जात हे। एखरे संगेच राहगीर मन ल भीषण गर्मी म सरबत पिलाके गुरु के बलिदान के स्मरण करे जात हे।

मुख्यमंत्री विष्णुदेव साय ह श्री गुरु अर्जुन देव जी के सहादत दिवस म उनला भावपूर्ण श्रद्धांजलि अर्पित करीन।

प्रधानमंत्री आवास योजना—राशि

राज्य सरकार ह चालू वित्तीय बछर म प्रधानमंत्री आवास योजना— ग्रामीण के तहत प्रदेश के सबो जिला मन ल दू हजार छै सौ ससत्तर करोड़ रूपिया ले जादा के केंद्रीय अउ राज्यांश राशि जारी करे हे। ए राशि एसएनए स्पर्श मॉड्यूल के माध्यम ले जिला मन ल आवंटित करे गेहे।

मुख्यमंत्री विष्णुदेव साय ह किहीन हे कि प्रधानमंत्री आवास योजना—ग्रामीण के तहत राज्य म हर दिन सोलह सौ ले जादा पक्का आवास के मनके निर्माण करे जात हे। ओमन बतइन कि पाछू ढाई बछर म दस लाख साठ हजार ले जादा आवास पूर्ण कराय जा चुके हे।

राज्यपाल—बैठक

राज्यपाल रमेन डेका ह आज लोकभवन म वीडियो कॉन्फ्रेंसिंग के जरिया गरियाबंद जिला के अधिकारी मनके बइठका लीन। बइठका म ओमन स्वास्थ्य, शिक्षा, स्वच्छता, जल संरक्षण अउ पर्यावरण संवर्धन समेत अलग—अलग बिसय मन उपर चर्चा करत हुए अधिकारी मन ल जनप्रतिनिधि मनके सहयोग ले विकास कार्य मन ल प्रभावी ढंग ले संपादित करे उपर जोर दीन।

राज्यपाल ह रेत के अवैध खनन उपर रोक लगाय अउ वैज्ञानिक अउ व्यवस्थित खनन व्यवस्था सुनिश्चित करे बर घलो किहीन। ओमन किहीन कि किसान मन ल प्राकृतिक खेती अउ हाइड्रोपोनिक्स खेती अपनाय बर प्रोत्साहित करे जाय।

तीजन बाई—स्वास्थ्य

प्रसिध्द पंडवानी गायिका अउ पद्म विभूषण ले सम्मानित तीजन बाई के तबीयत बिगड़े के बाद उनला हाल ही म एम्स रायपुर म भर्ती कराय गेहे। चिकित्सक मन बतइन कि उंखर स्वास्थ्य म सुधार होवत हे। डॉक्टर मनके टीम लगातार उंखर स्थिति उपर नजर राखे हुए हे।

तीजन बाई के अस्वस्थ के होय के सूचना मिले उपर संस्कृति मंत्री राजेश अग्रवाल ह दुरभाष म तीजन बाई के परिजन मन ले बातचीत कर उंखर हालचाल जानिन। ए दउरान ओमन भरोसा दिलाइन कि राज्य शासन तीजन बाई के चिकित्सा अउ जरूरी सहायता बर पूरा संवेदनशीलता के संग खड़े हे।

एनएचएम कर्मी-टर्म इंश्योरेंस

राष्ट्रीय स्वास्थ्य मिसन अउ एनएचएम के अधिकारी अउ कर्मचारी मन ल छै लाख रूपिया के निसुल्क लाईफ टर्म इंश्योरेंस कवर मिलही। स्वास्थ्य विभाग ह एखर बारे म बैंक ऑफ इंडिया के संग एमओयू करे के अनुमति देहे। ए सुविधा उन एनएचएम कर्मचारी मन ल मिलही, जिखर वेतन खाता बैंक ऑफ इंडिया म संचालित हे। सामान्य मृत्यु के स्थिति म ए बीमा कवर प्रदान करे जाही। स्वास्थ्य मंत्री श्याम बिहारी जायसवाल ह किहीन कि ए पहल ले एनएचएम के हजारों कर्मचारी मन ल सामाजिक सुरक्षा के अतिरिक्त लाभ मिलही अउ उंखर परिवार मन ल आर्थिक संबल घलो मिलही।

राष्ट्रीय आम महोत्सव

रायपुर के इंदिरा गांधी कृषि विश्वविद्यालय म आयोजित राष्ट्रीय आम महोत्सव के आज दूसरइया दिन हरय। महोत्सव के उद्घाटन काली राज्यपाल रमेन डेका ह करीन। ए मउका म ओमन किहीन कि छत्तीसगढ़ म आम उत्पादन अउ मैंगो टूरिज्म के अपार संभावना हे। ओमन किसान मन ले पारंपरिक खेती के संगेसंग आधुनिक तकनीक मन ल अपनाय अउ आम के वैल्यू एडिसन उपर ध्यान देके आह्वान करीन।

ए मउका म मुख्यमंत्री विष्णुदेव साय ह किहीन कि किसान मनके आय ल बढ़ाय म आम के खेती ह महत्वपूर्ण भूमिका निभा सकत हे। महोत्सव म देसभर के दू सौ पचास ले जादा कीसम के आम प्रदर्शित करे गेहे। ए महोत्सव काली ईतवार तक चलही।

जिले की चिट्ठी

प्रादेशिक समाचार एकांश, आकाशवाणी रईपुर डहार ले प्रस्तुत कारीकरम “जिले की चिट्ठी” के प्रसारण काली संझा छै बजके पांच मिनट ले छै बजके दस मिनट तक करे जाही। ए कारीकरम ल छत्तीसगढ़ के आकाशवाणी के सबो केंद्र रिले करही। ए बखत के अंक म “सारंगढ़–बिलाईगढ़” जिला के संबंध म जानकारी दे जाही।

